



Sesida dals

16 d'avrigl 2024

Communitgà ils

22 d'avrigl 2024

Protocol nr.

318/2024

Dumonda Bisculm Jörg

concernent la serrada da l'ura da consultaziun per Long COVID en l'Ospital
chantunal dal Grischun

Resposta da la Regenza

L'Ospital chantunal dal Grischun porscha dapi blers onns in'ura da consultaziun per pazientas e pazients cun encefalomyelitis mialgica / sindrom da fatigue cronic (ME / CFS). I sa tracta d'ina greva malsogna da plirs sistems che po – tut tenor il decurs – chaschunar grevas restricziuns corporalas e cognitivas fin a la perdita da la capacita da lavurar. Ella cumpara cunzunt suenter infecziuns viralas ed ha bleras parallelas cun Long COVID (sindrom post-COVID). Questa ura da consultaziun è in dals paucs posts da consultaziun per persunas pertutgadas e vegn tratga a niz intensivamain da pazientas e da pazients da l'entira Svizra. A partir da la primavaira 2020 èn er persunas cun sintoms da lunga durada suenter ina infecziun cun SARS-CoV-2 vegnidas assistidas en l'ura da consultaziun. Al cumenzament han ins dumagnà questa lavur supplementara cun las structures existentas. Gia suenter in curt temp è il basegn dentant s'augmentà fermamain. Il tractament e l'assistenza da las persunas pertutgadas èn fitg pretensius ed intensivs e pon vegnir cumparegliads cun l'assistenza da persunas cun grevas malsognas cronicas. Ultra da las uras da consultaziun regularas e da lunga durada èn quai cunzunt las suandantas lavurs:

- instradar terapias cun e senza medicaments;
- cumbatter la grevizza psicosociala, chaschunada cunzunt al cumenzament tras la ferma stigmatisaziun;
- manar discurs cun las patrunas ed ils patruns e declerar las restricziuns;
- involver las famiglias ch'èn vegnidas malsegiras e porscher scolaziuns per ir enturn cun las persunas malsaunas;
- elavurar numerusas argumentaziuns e blers rapports per las cassas da malsauns e per autras assicuranzas, cunzunt en cas da refusas frequentas al cumenzament;
- sa barattar intensivamain cun las medias ed ils medis da chasa e far recumandaziuns per terapias.

Per l'assistenza da las pazientas e dals pazients è stada necessaria ina collavura-ziun interdisciplinara, cunzunt tranter la policlinica medicinala, la fisioterapia e l'ergo-terapia. Tras il barat regular cun l'Uffizi da la AI dal Grischun ha pudì vegnir promovida fermamain la chapientscha vicendaivla per las difficultads spezialas da questa gruppa da pazientas e pazients. Temporarmain ha l'Ospital chantunal pudì engaschar persunal spezialisà supplementar ch'è s'occupà unicamain da las personas pertutgadas da Long COVID. Perquai ch'il dumber da personas pertutgadas è tuttenua stà fitg grond e perquai che bler dapli cas han uschia stuì vegnir liquidads cun las assicuranzas (da malsauns) sco er cun las patronas ed ils patrons, hai dà absen-za al plaz da lavur e disditgas en il team da tractament pervia da malsogna. Per mancanza d'interessentas e d'interessents n'han questas perditas betg pudì vegnir remplazzadas. Per che las incumbensas dal provediment da basa hajan pudì vegnir garantidas vinavant, ha l'ura da consultaziun per Long COVID stuì vegnir stritgada. L'ura da consultaziun per personas pertutgadas dad ME / CFS n'è betg pertutgada da questa mesira. Fin la stad na vegnan bain recepidas naginas novas pazientas e nagins novs pazients, ma las personas ch'èn en tractament vegnan assistidas vi-navant en l'Ospital chantunal. A partir dal settember 2024 pon – en ina dimensiun limitada – er puspè novas pazientas e novs pazients vegnir examinads e tractads en questa ura da consultaziun. In post da consultaziun per personas cun grevs sindroms da fatigue postvirals vegn mantegnì.

Tar la dumonda 1: La Regenza deplorescha che l'ura da consultaziun per Long COVID è vegnida stritgada en l'Ospital chantunal. Per las personas pertutgadas vegn la serrada ad esser ina mesira radicala. I n'è betg pussaivel da giuditgar definitivamain las consequenzas resultantas.

Tar la dumonda 2: In'ura da consultaziun per Long COVID en ina instituziun adattada en il Grischun fiss da beneventar. Pervia da la mancanza da persunal spezialisà n'è ina tala dentant strusch realisabla.

Tar la dumonda 3: La cuntinuaziun ed il mantegniment da l'ura da consultaziun per Long COVID è ina decisiun operativa da l'Ospital chantunal. Er sche la Regenza avess la cumpetenza da far prescripziuns operativas a l'Ospital chantunal, na gidass quai betg a cumpensar il persunal spezialisà ch'è necessari per il manaschi.



En num da la Regenza

Il president:

Dr. Jon Domenic Parolini

Il cancellier:

Daniel Spadin